

## Section roman

## L'TART' A TUROTS

Dins mes années d'jonnese, chatot eine tradition al mason d'mes parints d'cueillir les pus biaux fruits du poirier d' not' jardin , avant l'fin d' l'été. L' pèr' les disposot avec précaution sur eine planque prévue à c' t' usach au guernier, pour euss finir ed murir tranquill'mint. Ch'est queul' deuxièm' diminch d'octobre y' avot l'ducass qui s'installot sull' plach St-Martin et qu'nos poir's allo'nt garnir nos tart's en plus des tart's au chuque.

Ah les biaux momints des ducass's ! qu'eune effervescence dins l'mason. In faisot l'lessif' des rideaux d'ferniet's, in s'acatot ses sorlers d'hiver pour l'occasion et m'mère sortot s'bell' napp' blanqu' qu'elle avot taillée dins un drap usagé. Un gros jour qu'ell' app'lot « échelle » , courot tout autour et y'a qu'el mont' et baiss' qui savot l' nombr' d' heures qui avot éclairé s'nouvrach !

Mais rev'nons à nos poir's laissées au guernier et qui mûrissent. Ah l'parfum des fruits qui nous arrivot par vague dins not' chambr' ! In étot 3 lascards toujours affamés et un soir, m' pus jonne frèr' n'y t'nant pus, alla sins bruit nous querre tros biaux fruits parfumés. Pou s' débarasser des turots sins qu'in l' zes trouf'nt in les remit sul' planque à côté des aut's. Ni vus ni connus, l'manèch' a duré plusieurs semaines. In oubliot l' dat' del' ducasse qui approchot. Un samedi, al rentrée d' l'école, eine odeur d'pâtisserie châtouille nos narines. Misèr' ! les poires y n' davot presque plus... In commenc' à rougir et pis non, not' mèr' souriante comm' d'habitud' nous dit « J' vous ai fait un p'tit tourton pour vot' goûter l'zinfants ». Vite, in s'install' al taule et l'mère nous amèn' toute fumante eine tart' avec es garnitur' tout' fourséquée pad' zeur. « Eine tart' aux turots, ch'est nouveau mais vous d'vez connaîtr' » qu'elle nous dit.

Bein vous n' mé croirez p' t'être pas mais in a mingé tout' not' tart' in silenc' avec el' rouch' jusqu'à nos orell's.